

思伯子堂詩集

張亨甫傳

張亨甫名際亮建甯人少孤繼母撫之父嘗賈鄆州伯兄繼業亨甫幼穎異里中老儒李古山才之其家乃使之讀未冠爲諸生與族兄紳光澤高祖望何長詔友善肄業福州鰲峯書院同舍生多俗學亨甫視之蔑如也陳恭甫編修爲山長器之道光三年余至福州亨甫以詩來謁余曰何李之流也子才可及空同若去其麤豪則大復矣明年沈鼎甫侍郎視學閩中試拔貢第一乙酉入京師朝考報罷京貴人及名士言詩者無不知亨甫矣新城陳石士侍郎延寓其家曾賓谷巖使在京師

聞亨甫名召飲同坐皆知名士也曾以名輩顯宦繼意
言論諸人贊服亨甫心薄之曾食瓜子粘鬚一人起爲
拈去亨甫大笑眾慙曾不懽而罷明日亨甫投書責曾
不能教導後進徒以財利奔走寒士門下復不自知愛
廉恥俱喪負天下望累數百言曾怒毀之於諸貴人亨
甫以是負狂名慨當時諸公好士而無真識曾不如其
好色也取一時名優爲之傳著論一篇曰金臺殘淚記
筆力高古識者知亨甫所志遠矣都中交深者歛徐寶
善龍溪鄭開禧宜黃黃爵滋益陽湯鵬山陽潘德興唱
和尤密六年余至京師從遊者久之亨甫旣爲朝貴所

忌試輒不利自是歷遊天下山川窮探奇勝所交名賢
幾遍以其窮愁慷慨牢落古今之意發爲詩歌益沈雄
悲壯至天才豔逸情致綿邈則其本色而亨甫之詩乃
大成矣十八年鄉試主闈試者途中約張際亮狂士不
可中而亨甫已易名亨輔中式拆卷見其名疑欲去之
副考申解而止及來謁果際亮也主試愕然會試復報
罷二十余年余在臺灣召之亨甫喜將渡海及廈門畏險
使人寫其貌題詩寄余而返聞鹿澤長爲甯紹台道往
依之至則甯波失守狼狽走江西將至山東不果遂過
桐城視余家訪方植之光律原馬元伯而至湖北葉方

伯敬昌厚禮之復之吳中聞余爲英夷謀愬江南奏劾
有閩人附和其言亨甫憤甚見某公面責之計余赴逮
必過吳中棲遲以待七月余過淮上乃從至京師先是
亨甫有妾蔣氏從在淮及赴余難留蔣於淮屬其友亨
甫方沾疾扶病從余止之不可自投方劑未已余事白
出獄亨甫大喜從余寓炸子橋楊椒山故宅中延人治
其病而所患已深矣京師諸公聞亨甫急余難義之過
余者必問亨甫而湯海秋及桂林朱濂甫琦柳州王少
鶴錫振道州何子貞紹基晉江陳頌南慶鏞高要蘇賡
堂廷魁園陳弼夫景亮皆亨甫故人尤厚疾革日晨起

自訂詩彙屬余及濂甫執筆爲之去取其夕遂卒年四十五余及諸君經理其喪一時識與不識爭致賻焉余攜柩至桐城使人往閩召其子來以喪歸亨甫詩已刻者婁光堂彙松寥山人集南來錄未刻詩文尙多嘗語余欲編爲全集卒後余收遺彙於行笥將成其志焉其妾蔣氏在淮浦逾笄聞亨甫歿大慟誓死守或勸之嫁乃削髮爲尼一小婢感焉亦從削髮河漕二帥及善亨甫者咸重其才高其義又歎異蔣氏皆憐而資之一時歌詠其事者甚眾

論曰自古名公卿無不愛才近世則延納才士以爲己

名士利其財亦爭趨焉鄙者則面諛承奉無所不至此
尙知有廉恥氣節哉亨甫力振頽風可爲矯矯矣乃受
其書者不愧謝而以爲恨時人復被以狂名使亨甫達
而在上風節必有可觀者竟不一第徒以詩名是可悲
也亨甫內行甚篤善事繼母生平好遊伯兄常資之縱
覽名勝伯歿厚視諸姪有加每言繼母伯兄未嘗不泣
然也里中前輩闡揚不遺餘力所交海內賢士老不遇
者尤推揚之不絕年長於己者禮之必恭少於己者正
言教誘懇至其敦篤如此嘗負大志余稱其有經世才
人未之信後見盧厚山林少穆二帥亦稱之然後知余

非私言也

校正張亨甫遺集作詩誌哀

臨桂朱琦濂甫

昨者往哭松筠祠忍淚再讀松寥詩悄然風號萬竅悲
降婁耿耿無晶輝老鶴欲語聽者誰我昔遠遊類羈雌
長安逢君少壯時怒馬獨出黃金羈紅燈綠酒相娛嬉
墨瀋一斗翻淋漓朝吞千熊暮千熊忽逢拂袖遊雪溪
遠探禹穴尋會稽遂登黃樓望九疑猩猩呌煙鶴鶴啼
造化劃削愁肝脾南來跌蕩詩愈奇公卿名滿紛走趨
氣高蹇蹇頭不低欲止莫尼行莫追獨憶故人東海崖
澎湖高建十丈旗再戰再捷剽蛟螭咄哉小醜獨猖披
沿邊屯堞無完陣君時避兵走浙西戰場白骨厯險巇

皇躬仰視哀蒸黎傳聞和我餌島夷羣蜚刺天毀功碑
君方抱病吁且唏故人檻車奮相隨天門且喜翔金雞
朋舊往還暫軒眉疳鬼肆虐肺已萎侵晨視君坐牀幃
卷帙束筍一尺圍屬我編刻語溫咍刪者觸筆腕爲疲
存者加墨或領頤宿心已了遽蛻遺姚侯哭君淚更縻
爲營輻雲送之歸將蒐遺草付刪削如此高誼所見稀
案頭遺像何頤頤二三小兒角顰碁黑白鬪戰荒是非
旁有美姝捧玉杯大醉出門坐荒陂想見哆口談
嗟予薄宦恆苦飢正直可羞變脂韋青天寥寥雁
他日有過誰予規

愚伯子堂詩集目錄

卷一

古今體詩七十首

卷二

古今體詩八十三首

卷三

古今體詩八十七首

卷四

古今體詩六十七首

卷五

古今體詩九十二首

卷六

古今體詩一百首

卷七

古今體詩七十九首

卷八

古今體詩一百一十一首

卷九

古今體詩五十七首

卷十

古今體詩一百十九首

卷十一

古今體詩一百二十七首

卷十二

古今體詩一百六首

卷十三

古今體詩六十八首

卷十四

古今體詩一百五首

卷十五

古今體詩七十首

卷十六

古今體詩七十三首

卷十七

古今體詩八十八首

卷十八

古今體詩七十九首

卷十九

古今體詩九十八首

卷二十

古今體詩九十三首

卷二十一

古今體詩九十二首

卷二十二

古今體詩一百二十首

卷二十三

古今體詩一百十五首

卷二十四

古今體詩一百五首

卷二十五

古今體詩九十二首

卷二十六

古今體詩七十八首

卷二十七

古今體詩一百六首

卷二十八

古今體詩九十五首

卷二十九

古今體詩一百十八首

卷三十

古今體詩一百六首

卷三十一

古今體詩一百四十九首

卷三十二

古今體詩一百三首

右思伯子堂詩集三十二卷建甯張亨甫先生之所著也先生以道光癸卯急先大夫之難歿於京師疾革日自訂詩藁屬朱伯韓侍御琦執筆爲之勾乙時已噤不能言以首俯仰示意而已既畢先大夫藏於行笥將爲刊行屬多故未暇咸豐初粵

思伯子堂詩集

目錄

四

西亂起先大夫奉

詔赴軍留是編於家命濬

昌愼爲藏弄癸丑先大夫見背桐邑亦陷於賊濬
昌先世遺集及是橐皆以預藏山中得未焚燬嗣
是屢經喪亂轉徙烽煙閒所往輒以自隨前歲丙
寅旣重刊先集於安平將取斯編校梓以繼先大
夫未竟之志旋值入都未果今年重蒞安福退食
之暇迺與友人鄭容甫福照詳加編校付之手民
計詩三千五十一首先生集已刻者十餘卷板片
悉燬於兵同治丁卯其門人李華峯雲誥求全本
不得乃哀集散橐刊於閩中然多遺佚字句亦頗

有訛漏辛丑以後則全佚焉而原本獨藏余家
懷先友撫覽遺編亟爲流傳非濬昌之責耶集以
思伯子名者先生幼孤賴伯兄資之得力學有成
故名以志不忘也原橐嘉慶乙亥至道光甲申曰
松寥山人初集乙酉至戊子曰婁光堂稿己丑至
壬辰曰谷海前編癸巳曰豫粵游草甲午乙未亦
曰谷海前編丙申至庚子曰谷海二編辛丑壬寅
曰谷海後編今每卷前不復標題而附著於此原
本缺己丑歲作蓋先生入都時未攜入行笈茲取
李刻本補之又癸卯歲詩二十餘首原載別本亂

後佚去故今所編訖於壬寅凡橐中已刪去之什
不復刻入未刪者雖詩未工亦仍存之蓋當時去
取容有深意未敢以臆見廁乎其間也原橐無總
叙謹以先大夫所撰傳弁諸簡端朱侍御七言詩
一章叙刪訂詩稿事甚悉亦並錄焉先生子誦芬
依先大夫蜀中數年旋歸閩卒孫新魁幼遭賊脅
逃歸貧乏不能自存余聞遣人往建甯覓得之以
其孤幼廢學令習賈冀或有成以延其祀嗚呼先
生負異才坎壈畢世賁志以沒子孫復式微若此
天所以厄之者亦云至矣獨遺詩迭經兵亂不至

埋沒灰燼卒使流傳人間冥漠中若有呵護之者
殆所謂立言不朽其光燄之莫可磨滅實有以自
致耶剞劂既竣爰書校刊歲月顛末於卷首以誌
弗諼云同治己巳中秋桐城姚濬昌謹識

思伯子堂詩集卷一

建甯張際亮亨甫

梅花 乙亥

多時苦風雪不覺春已闌
半夜聞香起孤村隔水看
疎花湛清露皎月生空寒
惆悵未能別煙波方渺漫

清明前四日作

又看時節近清明獨上高臺緩旅情
人事半隨花事老春愁多傍客愁生
河邊樹斷孤帆影關外雲歸暮角聲
更是不堪樽酒罷瀟瀟風雨滿空城

留別家嚴山

紳先生

思作子堂詩集卷一
飛來鸚鵡鳥常伴美人歌昨夜隴山去空閨愁思多彈
箏時歇撥織錦每停梭揮手明朝別相看汝我何

客思

載得葡萄酒乘風江海遊片帆吹萬里一笛泛中流鴻
雁復飛至瀟湘生早秋扣舷歌水調客思滿滄洲

桃花

悵望江千浪不流武陵城外舊維舟一時人去煙中路
二月春寒水上樓曉色欲來高樹動薄痕初度夕陽留
年年花事君前好相見何須怨白頭

落花

東風昨夜送春回。滿目飛花劇可哀。最是美人新怨別，
不堪孤客獨登臺。綠肥波面鴛鴦老，香盡枝頭蛺蝶來。
今古繁華同一慨，拚教沉醉掌中杯。

荏苒韶光付逝波。一春節物又空過。無端冷落成烏有，
如此飄零喚奈何。紅粉睡殘猶帶淚，翠蛾妝罷不勝歌。
看花自感銷魂事，始信深宮怨綺羅。

聲聲紅豆夕陽天。何處相思不可憐。客散鴉啼高閣外，
病多人瘦晚風前。怱怱舊恨生芳草，渺渺新愁接暝煙。
借問江南歌舞地，祇今誰識杜樊川。

客有道匡廬之勝者因作

君家廬山下向我道廬山一夜青天月香燭五老閒遙思謫仙宅應掩遠公關借問雲中鶴西飛何日還

登城

南浦孤舟去西風一夕生離人看秋月獨上驛南城

雜詩

繁華安足慕徒供後人哀浩浩楊子江六朝去不回驅車遠行邁息駕至蓬萊相逢赤松子酌我黃金罍惜哉愚不悟終古奄塵埃

皎月出東北清光寒高林展我露中坐理我此心琴鳴雁去不息江漢長哀吟方舟駕言邁風波險且深昭昭

天上星鬱鬱傷我心

夜深不能寐攬衣出門行悲風從東來唧唧寒蛩鳴原
野正蕭索蕭索使人驚安知天地心時序弗復榮落葉
何紛紛去鳥何冥冥仰視烏鵲飛翱翔何所營

洛陽城中子車馬去咸陽綺閣臨春風少婦曉彷徨弗
言從此別樽酒勸郎嘗郎看洛陽水悠悠流故鄉

亡名氏山水畫障

眾峯隱見如神龍蕭蕭秋響來半空陰風吹日石勢墮
但見槎枒倚壁之虬松崖頭老閣迴於鳥大筆橫披氣
不小倪黃米范失清奇五指疑有蛟螭繞峨嵋路轉橫

江寬濛濛夕照低烏丸怒潮捲地作雪立舵樓人倚孤
舟寒千年能品匪易得滿堂坐對爲動色古來傳者不
貴名不朽精神視縑墨卻卷此幅三摩挲富貴陵谷同
銷磨麻姑曾見湮東海一藝區區當奈何

明月詞

十五明月圓十六明月蝕明月不常滿況是儂顏色前
年寄郎衣今年望郎歸閨中芳草生蝴蝶空來飛章臺
柳花好不憶閨中草郎是蝴蝶身蝴蝶歸來早望郎望
江水江水長悠悠風波千萬頃何處是郎舟黯黯江上
山江雲日夜還儂身作江月相見識郎顏

望迎墮觀

碧煙紅樹遠離離古寺秋殘向午炊
莫上城頭望山色
風光又是去年時

秋日懷廖三西田

定晴

結廬桂花下花落空山秋倦臥
齋中雨時登池上樓城
高鴻雁杳江遠白雲愁
故友今何處滄波日夜流

古意

妾家住橫塘生小蛾眉長十三學歌舞
嬌音如鸞鳳含
睇羞蛺蝶十四解梳妝常恐秋風至
坐令減容光鄰笙
昨夜吹知是行人歸
兔絲附喬木蓬麻相對垂
嚴霜已

云暮元蟬號枯枝攬鏡一太息太息徒相思

送人之武昌

雁鴻飛下楚江秋江樹寒空見暮流一夜月明煙水闊
故鄉何處莫回頭

武昌城內黃鶴樓崔顥題詩李白遊漢水千年流不盡
行人又上木蘭舟

偶讀吳梅村集書後

貂裘大將入居庸鐵甲寒光照幾重遂使燕山先得鹿
爭禁淮水不從龍烽煙疾首紅羊劫禾黍興歌玉輦蹤
翠羽靈旗招不得蕭蕭暮雨打江楓

其二

名士由來末路難
白頭紅豆故人歎
江南無地容徐鉉
白下流風誤謝安
一代滄桑餘涕淚
四朝壇坫盡衙官
月明鐵馬秋山夜
醉眼摩挲不忍看

城上晚眺

蕭屑朔風來
殘陽散蘆葦
天末去鳥微
林隙孤煙起
暮靄連遠空
行舟寒色裏
星月滿江平
故鄉知何似

黃鵠歌

雙雙黃鵠止我庭
前庭前相思花開落
不計年記得行人
欲別時春風春草
訂歸期揚帆一去
夕陽盡萬里關

河孤雁飛朝復暮登樓望江路紛紛車馬下江船渺渺
愁心上江樹

思美人

秋蕭蕭兮無衣天蒼蒼兮雲飛蘭桂代謝兮燕雁徘徊
黃河落影金風吹波濤過瀾兮潛蛟螭美人兮歸來

秋柳

霜露淒涼落葉多關門醉聽馬嘶過一鞭殘照風吹鬢
昨夜河梁水復波官渡秋光愁遠望蘇臺暮雨怨清歌
慶奴憔悴重光老臨別銷魂可奈何

遠離別

桑乾一河水長作兩邊流落日關山遠高風旅雁秋何
當辭故國此去有孤舟數曲驪歌罷蕭蕭生暮愁

送客

晨起置樽酒寒光生蓑衣顧彼雙飛鳥眷眷常追隨前
夜聞秋風昨夜聞秋雨風雨滿長途君今去何許但聞
落葉聲不聞行人語

題旅店壁

十里關河五里煙秋風作就薄寒天碧山高閣客吹笛
紅樹小橋人喚船記得去年曾送別相看今日轉成憐
故園遙指應何處點點飛鴉落葉邊

夜別

一笛起江天秋風急放船山高星在樹水遠月生煙城郭樓臺靜村墟夜火圓殷勤顧樽酒此別又經年

歲暮

北風吹不止多病獨登臺江上碧雲斷紛紛塞雁來寒城殘日淡古驛亂山開滿日蕭森意因知歲暮催

抱病山中友人過訪復送別

歲晏蟪蛄鳴閉門見落葉冉冉白日徂滔滔滄波接種瓜思及春種菜思多露臥病思故人故人來何暮見君情已苦別君心無主千山落日深一去生風雨

雪夜聞琴

江上晚彈琴，微茫寒雪深。月明孤鶴下，寂寂對高林。時有暗香動，遙知何處尋。滄波一千里，都作廣陵音。

春日再送友人之白門

丙子

更買江南一葉舟，東風昨夜長淮流。孤身白下逢寒食，細雨清明上驛樓。莫作楊花怨飄蕩，應知春色綰離愁。亭前餞別吾憐慣，半醉從教酒力遒。

計程此別又河津，去到他鄉極望頻。疎樹酒旗瓜步帆，夕陽魚市秣陵人。遙憐作客重逢客，況是傷春復送春。可憶樓頭少婦望，年年花落草如茵。

山居

殘陽不到處家在數峯陰瀑影過崖斷花香當戶深倦
隨飛鳥入行與好雲吟聞道采芝客春來何處尋

題畫

布帆搖漾碧琉璃曉市煙痕溼酒旗一髮青山寒欲沒
西風吹雨過江時

春日別西田

分手碧山頭桃花與子愁春風千萬樹曉色上征裘馬
首官橋雨江聲驛館樓去來多少恨綠水繞城流

旅懷

東風吹恨到垂楊一夜花開十日香江上青山江口樹
登樓何處不思鄉

過廢關

雜沓萬重山風鳴匹馬還兵戈餘廢埃天地有雄關嶺
峻猿聲急林深日色殷年來愁梗道冒險此登攀

登城

孤蒲風色晚蕭蕭碧水流春上柳條誰與遠人管離思
滿城明月又吹簫

臥雲老人歌爲何桐侶師七十作

生不識洞天三十六但聞仙人高臥雲中屋山深道遠

豺虎驕卻掃丹霞枕寒玉長空萬里蕩碧波天風吹月
臨秋河抱琴半醉時嘯歌見者下拜爲咨嗟門庭春暖
澹如水窗外日高呼不起耳畔時聞折竹聲莞然夢落
飛泉裏醪醕酒熟甕欲開瑤草綠上珊瑚杯我家通元
與酣差解事手持大爵瓊漿來山中白雲那有盡千年
老鶴常飛迴

閱晉史偶書

骨肉爭權怨毒儲卿家此座復何如空嗟太尉營三窟
不望將軍得一書草沒銅駝兵劫盡江沉鐵鎖戰功虛
石頭城外連京口落日寒濤恨有餘

遊鼓山

峻嶺何高曠
天空見百蠻
孤雲明海色
落日滿秋山
攬秀林巒靜
懷清水石閒
上方鳴法鼓
悵望鳥飛還

喝水巖

葉落杳無路
忽聞飛鳥聲
夕陽開竹翠
天水澹空明
雲靜石華秀
淵寒秋氣清
導師自心動
虛喝壁泉鳴

望海亭

秋老水天昏
層陰盪海門
瘦蛟搜日去
亂鳥壓雲屯
島嶼星千點
檣帆葉一村
七鯢吹鐵笛
哀怨總難論

登劣則峯

山勢南來此獨尊，崢嶸高踞近天門。
千年風雨摩峯頂，滿地蛇龍走石根。
故國可堪紅葉暮，舊碑半沒碧苔痕。
玉壺金碗葡萄酒，醉眼憑陵總莫論。

野望

夕陽千里風急亂飛鴉，山抱城邊路江流。
烏外霞乾坤容作客，歲月苦思家。
海上無來雁，何因問釣槎。

閩中感興

高城沙鳥逼秋天，襟帶蒼茫島嶼連。
霸國江山龍虎地，海邦日月漢唐年。
花袍野祭楊梅酒，土舶官輪蛺蝶錢。
險要由來兵餉重，豈徒開府爲防邊。

閩江之水不西流東下烏龍載海艘縱豫廈門屯汎策
要勞軍府幄帷籌怒潮卅地寒旗鼓分野占星聚女牛
見說

昇平多氣象桃根桃葉共芳洲

三年調戍閱星霜去路誰知險莫當鹿耳秋高滄海嘯
雞籠雲起颶風狂窺人魍魎燃烽火終古鼉鼉傍戰場
幸喜

盛時無內外居然控制及遐荒

常袞祠堂碧草堆八閩文學自公培江波今日臨淵意
風俗何人濟世才卻憶金牛盤浪去絕無白馬控秋來

尚聞兒女談神石海上雲陰黯不開

謁李忠定公松風堂

今爲南臺天甯寺

坐見螺江水亂流汴梁鼓角逼南州可憐窮海孤臣在
回首中原二聖休謾謾松風荒寺古蕭蕭花石故宮秋
暮年竄跡英雄恨盡在滄波落日頭

客夜

孤雁向空鳴風高月滿城樓臺燈火市鼓角暮江聲作
客一多故思家百感生關門楊柳樹搖落不勝情

劔浦感別

兩水夾城流秋光白浪頭川原盤落日魚鳥帶歸舟別

意龍津渺鄉心菊酒留東南此分袂爲汝重登樓

福州歸道泰甯謁李古山祥廣丈人梅巖留飲

嶙峋怪石結藤蘿照眼斜陽駐馬過客路歸裝書卷重
文章知己老成多竹邊秋色濃於酒谿上雲容澹欲波
拚醉出門何日晤青衫白髮影婆娑

歸

松際忽潺潺寒雲入故山瀑聲千石負秋色萬峯關下
第眞時命高風滅鬢顏祇憐黃耳吠偏逐主人還

自題小影

梧桐葉落晚風寒秋水蘆花去住難記得斜陽樽酒罷

自攜瘦影倚闌干

月夜聞笛

微雲歛斷峯夕嵐明飛鳥笛聲何處來惆悵山月曉

暮

萬壑夕陽通柴門暮色中倦遊餘老馬多病到秋風託
世孤生竹求知再嬰桐稻梁南土盡飢雁晚怱怱

感懷

丈夫在世不稱意何不棄家爲遠遊卽如一身局促甚
安知萬古名姓留飄然鼓棹竟東去海風落帽雲當頭
泠泠赤足鼃背踏湛湛青眼天空流拍拱崖揖浮邱瓊

花壓酒色深碧金樽倒盡人間愁君不見上有
聖人聖天子下有賢相賢諸侯

晉宮

徒勞宣帝謀三國竟棄中原與五胡六載愍懷俱北狩
百年氐羯尙南驅出師淝水成孤注拜表涼州念故都
誰向新亭思戮力銅駝落日自榛蕪

宋宮

倡義人驚一世雄暮年收陝自奇功秦民久望江南旆
胡騎旋嘶渭上風卻擁如羆歸白下再難逐鹿入關中
六州休話元嘉事戰血春流滻水紅

齊宮

臨江兵馬北來驕
縛袴無君罪不饒
縱毀銀鎗誇小節
豈同玉導碎先朝
驚啼太極傳天語
鬼唱西京起木妖
今日秋風禾黍地
蓮花步步貼金銷

梁宮

三十蕭郎意氣豪
鯨鯢手戮戢波濤
金甌鞏固初無缺
寶塔莊嚴恨不高
南斗竟徵天子走
東堂忍問叛臣勞
可憐多少長干寺
回首斜陽徧野蒿

陳宮

綺閣朝開翡翠窗
掃眉學士按新腔
春濃玉樹歌三疊

人醉珠簾影一雙
狎客不知來日短
老奴坐見望風降
憑將衣帶誇天塹
烽火多時已過江

隋宮

遶海金河捲旆旌
太原王氣任縱橫
百年苦短揚州夢
一去長流汴水聲
豎子渡江真有讖
美人對鏡已無情
白楊蕭瑟雷塘晚
四十離宮月自明

客中對月

天上有明月
地上有繁霜
繁霜只在地
明月斷人腸
開愁歌效長吉

天公驅日騎
青山寒雲滾
地長城關風
吹白草鬼語出

老秋颯響摧心顏芙蓉入腹素衣冷劒光一擊放孤影
我今十八壘塊多玉泉噴溢修金縷汲水壓酒蛟珠杯
舉手招得神龍來

思伯子堂詩集卷二

建甯張際亮亨甫

春柳丁丑

嫩寒過雨黯迢迢城郭依稀認六朝陌上春痕紅粉淚
天雁風色白門潮一樽濁酒偏相滯二月垂絲奈不消
乳燕未成樓閣晚阿蠻何處著纖腰

條條刀尺費裁量絮語剛逢話短長有客他鄉作寒食
送人明日上河梁生憎綠水長無恙最是青年不易當
門巷桃花千萬樹撾鞭初聽馬嘶忙

手折愁痕尙宛然又吹新綠近江天周遭浦港初無樹

平遠樓臺半入煙到眼風流都惜惜關心釵鈿動年年
斜陽夾岸春波滿墮馬紅衣過畫船

顛倒春風太有情惹人何必舊金城接來桃葉剛前渡
吹到萍蹤又一生淡淡春光多近水陰陰天氣正聞鶯
關山眼見團圓影爭似羌兒玉笛聲

送家兄來儀客任邱

故園初見歲華新班馬旋嘶古道塵一十九年僑寓地
數千餘里獨行人西山雲曉開晴翠上谷天寒失晚春
到日登臨休悵望尺書須附易河鱗

江上

細雨斜風客去落花芳草人閒一江春水殘日到處暮
雲亂山

春怨

桃花半面愁老楊柳十圍恨長莫聽北樓弄笛可憐南
浦斜陽

三月廿八日作

後山明日
之邵武

手折垂楊柳明朝又送君春愁多近樹野水不分雲浩
蕩看行旅蒼涼易夕暝後時梅子熟孤館悵離羣

惆悵

薔薇落盡海棠空早見安榴一朶紅惆悵年年三月暮

照得子集卷二
酒杯容易送東風

聞家兄自任邱將往陝右有作

薊門春色五雲端千里方嗟駐馬看又去渡河尋大華
再來見日在長安倦遊歲月身將老漸遠關山信益難
頻向客中還作客故園兄弟愧漁竿

客樓秋感

九月邵武作

目斷家山正感秋西風殘照又回頭烏鴉亂落天邊影
黃葉寒生水上樓送別遠經南浦路思歸難買一扁舟
不知誰按紅牙拍無數蘆花攪暮流

楚江圖送人之湖南

鴉散夕陽寒滄波暮渺漫西風兼葉落南指楚雲端
泚瀟湘去空青影一團扁舟能見念還寄畫圖看

書板橋雜記

江南好景本無多兵火身經喚奈何卻似龜年飄泊後
酒闌紅豆一悲歌

開府頻飛告急章新箋燕子按歌忙白門桃葉青溪柳
不解春風有戰場

舊院通街接御溝秦淮無恙水長流烏衣去後春如許
贏得閒人上酒樓

惆悵霜笳閒洞簫白頭遺老話先朝孝陵賸有多情日

夜夜流光照板橋

福州清明日作

戊寅

今年春事太匆匆昨夜花飛徧地紅誰插六街楊柳色
酒懷無限夕陽中

江樓

越王臺畔水清華獨立江樓數暮鴉落日帆檣千估舶
東風絲管幾人家客中春盡方思酒城外天寒不見花
積悶裁詩排未得濁醪眞謁比鄰賒

憶熊湘臣

惜春愁坐酌流霞苦憶當年別路賒送我一程江上水

思君三月雨中花
怱怱冷節過寒食
漠漠濃陰噪晚鴉
淚盡不堪繙舊篋
遠書叮囑愛年華

留題湧泉寺壁

山深羣動息悄悄
上孤煙江色高於嶺
松聲靜在天齋
廚窺竹飀夕梵答風泉
身世皆無著閒情益杳然

月夜

流水無多月有煙
吹簫聲落彩雲邊
湘紋不捲人斜倚
一半燈光射畫船

秋夕述感

秋氣一夕至百蟲皆有聲
臥聞木葉落起看江月生煙

寒積極浦析遠沉空城肅肅露華靜耿耿河漢明懷往
易任運逆來難爲情西望大弋山夜色皎已盈尙維晉
張掾挂席從蓴羹

大風望嚴山舟未至

長風吹海雁萬里落高臺寒色連天起秋聲一夜來故
人江路遠何日布帆開波浪蛟龍惡滔滔慎溯洄

夜夢檢先五兄洞庭遺文泣誌

八年天上事何如零落殘編幾蠹魚滄海一身秋臥病
故山千里夢遺書燈花影暗西風下木葉聲多欲雨初
死恨生離歸計誤朝臨明鏡鬢應疏

江上晚懷

一夕生秋水江潮人未歸夢經南浦路寒近故鄉衣月
暗鱸魚上風高去雁稀客心空日夜誰念謝元暉

同建州蔣大拙齋

蔣

丁二樸夫

汝恭

鄰霄臺晚眺

落日高臺上溶溶見海雲大江流暮色寒鳥逐歸羣勝
友如秋爽羈懷傍晚殷故園休更話葉下共紛紜

題鄭六亭

兼才

先生東瀛守風圖

先生教諭臺灣以軍功擢縣令

不載歸舟阻風海中因繪圖屬題

雲氣茫茫暗白波洪濤日夜走鼉鼉遙看天末檣帆去
只似人閒宦海過薄視一官應有故長風萬里竟如何

予生多病無能役尙欲爲圖問薜蘿

鄉思

客久未歸去酒闌鄉思生大江起風色昨夜已秋聲木
老飛孤葉山寒帶暮城西流正難望斜照若爲情

登釣龍臺

浪濤東南去鴻雁西北來淒其萬木風怨此千年臺逐
鹿旣非望釣龍徒可哀江山勢飛動雲水光徘徊秋聲
極浦生雨氣重關開辨帆顧往路聽馬愁征埃英雄自
有待楚漢誰無才滔滔日暮波投竿持酒杯

送客

華髮故人稀秋風君獨歸孤雲看遠道落日照征衣酒
醒天將暝山寒葉正飛定知今夜宿飄泊歎予非

寄懷何七金門

長詔秀才

朝攀堤柳起秋波昨夜聞江浪又多與我別時原鄭重
負君深處是蹉跎天涯數月容高枕雲際重山黯翠螺
千里西流應返棹菊花門巷一樽過

福州送嚴山歸

秋風吹海水江雁盡南飛獨客他鄉倦看君一葉歸峭
帆開曉浦列岫向朝暉借問嚴峯下鐘聲幾翠微

送甘秀才搏南

志辨

歸泉州

秋風吹到越王城，纔上離亭雁有聲。
送別難爲中酒候，論才同是少年情。
馬頭醉擁山光起，鼇背迴看海色明。
後夜廈門關外月，照君應憶我西行。

晚望

莽莽起秋陰，空城鼓角沉。
雁兼千葉落，天與大江深。
望遠驚寒色，思歸積苦心。
山園菰菜晚，愁共客猿吟。

洪山橋同李大後山

良鈺

送熊藕亭

際遇

先生卽

送後山

我欲騎鯨捉鼉鼉，大江手決終不波。
毋使行人過南浦，千秋萬歲銷魂多。
李大長歎曰：不然卽今予亦催歸船。

世路崎嶇甯可問此言未畢俱黯然邊城八月新涼早
郵亭落日向衰草千里家看塞雁遙百年才被秋風老
浩然鼓棹竟西去竹關回首還何處曉霧收晴劒浦山
棲鴉啼暝杉陽樹聚散浮沈事愴神金樽進酌恨遑巡
忽思徐氏花園月飲罷於今又四春歲乙亥先生館於城南徐氏花墅其
中梯雲閣下碧桃開時曾過飲丹楓認作碧桃落可憐都似梯雲閣一
場酒醒一場愁人生消得幾離索夫子前程願自持望
帆遙語倏如馳舉杯更勸謫仙醉後夜相思總水湄

送友人歸里

金饒山色近何如匹馬西行問舊居故里幾人同作客

他鄉送爾益愁余
螺江日落寒潮起
劔浦風高古木疎
此去驚秋休怨別
雁來須寄數行書

晚發閩中渡江有作

秋榕葉萎水晶宮
去住無端類轉蓬
人代茫茫悲白馬
風帆歷歷下烏龍
歸鴉亂點川光動
落日回蒸海氣濃
最是金鰲峯上月
漫來舟次若爲容

時予數月居
鰲峯書院

宿建州聞笛

醉臥江臯聽水聲
誰家玉笛暮淒清
憑君莫怨關山月
一夜秋風已滿城

宿漁梁

梨嶺秋風急漁梁木葉飛萬山殘照裏寒色滿征衣

仙霞關

清旦北風起啼園滿故關遲迴看嶺上慘澹度雲間雨
氣盤三浙秋光老百蠻文襄有遺烈廢堠野花斑

峽口道上口占

雨霽江村水接隄肩輿坐看麥花齊碧山平遠寒煙外
紅樹依稀小閣西旅夢正如蝴蝶幻鄉思都到鷓鴣啼
最憐門巷斜陽色秋草蕭蕭認舊蹊

舟發清湖

小湖樓閣晴如畫下市煙波曉向秋趁得西風吹醉去

江城塔影布帆頭

泊江山縣

舟行二十里晚泊傍荒城山氣遠逾碧夕霏寒正明秋
林人病色急瀨雨來聲臥看江郎石無煩計去程

夜泊蘭溪聞笛

城上有高樓樓前江水流秋風吹玉笛明月滿孤舟

過釣臺

昔年一狂客高隱此持竿片石風雲古荒江日月寒我
來弔臯羽人去總空灘惟見長松樹龍髯幾鬱盤

風雨不得往湖上戲爲短歌

我聞西湖比西子，火急欲見煙鬟容。阿香夜推雨車出，遂使暴漲船不通。棲霞嶺上憶滑滑，湧金門外愁洶洶。豈但奔濤若白馬，正恐負楫勞黃龍。坐歎未嘗忤水伯，定是箕畢羅身宮。安得千手斧，大塊揭出日月開羣蒙。水清石瘦泛輕舸，還我南高北高之好峯。

夜渡太湖

天光雲影望悠悠，楓葉蘆花帶淺流。惆悵孤帆煙水裏，月明七十二峯秋。

吳門晚眺

一唱吳趨未易還，江城日暮望鄉關。新寒暗入長洲樹，

舊事愁看廢苑山花路遠分飛鶴外酒旗斜颭夕陽閒
要離冢上今宵月能照青衫客鬢斑

題虎阜寺壁

繁華人盡說蘇州買棹爭來虎阜遊不信千年歌舞地
春風吹白老僧頭

自吳門渡江主人置酒口占爲別

飲罷葉紛紛江寒去雁聞高風五人墓細雨九娘墳我
本天南客來書白練裙朝思京口浪遂別太湖雲

遊焦山

守風丹徒浦駕言徂松寥山虛江水深萬鎰中蕭蕭筆

木石華映瞰波雲勢遙天低海門日帆去瓜洲潮蒼然
見京口戰氣寒不銷兵劫閱時代佛圖同旦朝因僧撫
周鼎恍有神怪朝道近物莫寶世逝靈俱昭迴看浪濤
上空翠盤岩巖

金山晚興

楊子津頭夕照明寄奴城外落帆輕六朝廢壘生秋水
千月空江聽雁聲故國音書猶未達孤舟遲暮欲何營
魚龍出沒煙波杳蕭瑟高臺萬里情

曉渡京口

神前酌酒曉開船挂席中流望淼然瓜步江寒初見日

松寥天遠只如煙
依微浦樹層嵐裏
高下風帆去雁邊
形勝東南征戰舊
狼封莫廢太平年

過燕子磯登絕頂

峭壁巉巖遏浪奔
振衣絕頂正朝暾
斷鴉點點黃天蕩
垂柳依依白下門
北固青蒼寒裏見
南徐杳靄望中昏
可憐王氣銷沉盡
更灑磯頭酒一樽

晚次觀音門卽事有作

暮寒江上渺愁余
風土荒涼勝國餘
退綠楊枝經雨靜
空青山色入煙虛
衝波小艇人撈蟹
踏葉橫缸客買魚
苦憶南朝無事日
水邊多是莫愁居

金陵晚眺

可憐杯勺水流盡六朝春戰伐
渾閒事江山待醉人葉
稀鴉滿樹城迴雨如塵
莫憶秦淮月風波起夕蘋

采石月夜

寒碧大江流煙波蕩蕩秋天風吹海月一夜謫仙樓
我憶騎鯨去誰爲衣錦游青山雙白鶴飛近片雲頭

曉發

清晨牛渚磯蒼翠上征衣日出煙徐引風寒鳥獨飛
天涯孤客久江左舊人稀浮世茫茫事論心愧自違

鰲磯孫夫人廟

恍惚刀環擁翠旗千年遺恨泣蛟螭湘江有路從虞后
杞國無文謚叔姬歲暮煙波寒鵲首夕陽山色送蛾眉
殷勤手採霜蘋薦磯畔靈風颭颭吹

自京口至皖江舟中雜詠

蘆花到處煙如織柿葉明邊雨似絲應是江南風景別
十分惆悵酒闌時

楊子江頭正落潮瓜洲城郭水煙遙離人一灑秋風淚
便著垂垂舊柳條

石尤風過畫屏風蒲樹江樓對影紅手把一枝水楊柳
六朝春恨夕陽中

秣陵城莽草先秋采石天寒水亂流不待登臨有鄉思
煙波今日已知愁

夜半吳姬擲玉簫滄波碧落共迢迢知他對怨蛾眉月
一帶紅楓第幾橋

姑孰江空樹有烏亂帆葉葉下蕪湖白羊一隊黃沙上
絕好秋風出塞圖

愛月不堪涼露下看山仍避曉風前布帆合寫頭銜字
第一人閒病少年

關山月色九回圓鄉夢迢迢路二千苦憶紅閨牽袂別
珍珠簾下養花天

江南城郭皆栽柳我過江南唱柳枝長願年年二三月
碧隄紅樹住多時

消瘦

一葉扁舟越又吳自憐消瘦在歧途秦川舊事王公子
楚澤新吟屈大夫寒雁無聲鄉信斷夕陽有影病身孤
書生不似英雄氣髀肉摩挲憶馬瘡

夜泊皖城就寢矣聞風聲甚壯起視月色皎然酌
酒成詠

風勢激波濤城頭鼓角高青天雲破月碧酒夜澆刀苦
憶龍沙遠甘親虎帳勞少游鄉里願何必是兒曹

舟中感懷

黃金銷盡少年心
歲暮關河淚滿襟
百感可憐歸衛玠
一生何處老王欽
石頭雲氣連吳迴
湖口山光出楚深
莫極江南千里目
湛湛流水帶楓林

過小孤山

蒼然寒色裹金碧
梵宮浮山截江心
立波翻塔影流征
帆隨去鳥落日動
高樓雲水空明極
無因一覽收

望廬山

匡君有廬宇千載
楚雲多今夕潯陽
宿颯然風水波香
鑑正孤月瀑布倘
明河欲就永師去
朝來攀薜蘿

登江州城樓

朔風千里起江關，天迴城高暮色閒。
楚雨白於彭蠡雁，吳波綠到漢陽山。
蒼茫廣澤生寒早，飄泊孤舟去路艱。
惆悵玉人猶弄笛，琵琶亭畔葉斑斑。

琵琶亭

慘澹銀燈照四絃，月波楓葉夜如煙。
銷魂莫話紅顏事，幾箇人堪憶少年。

權使風流幸未湮，壁間題碣是通人。
虧他交代春愁去，手種垂楊滿水濱。

潯陽舟中贈別

君看漢陽山我飲關海水酒醒各孤舟月明去千里

過大孤山

不得鄉關尺素書空臨湖口恨雙魚蕭蕭落照依山盡
杳杳孤帆出霧徐鐘磬一時音澹蕩樓臺終日氣清虛
便因歸去移家具好向蓬萊頂上居

風雨泊青山夕霽登眺有寄家嚴山先生

悲風起廬阜雨勢來嵯峨借問江上山歲晏人如何大
孤雁應盡左蠡雲沉多寒際愛稀樹暝邊明去波悠悠
厖里閉蕩蕩憑關河豈意破浪志翻爲亡羊訛驚名旣
違性蓄感徒慨歌高霜戒新霰倦翼依舊柯日夕墟市

煙黯澹生藤蘿庶幾謝池雪言做剡溪過

送客還丹徒

楊子江頭月何年如許愁匡廬寒照雪彭澤獨歸舟屋
傍西津渡樽移北固樓空憐君到日春浪已悠悠

泊吳城登望湖亭

望湖亭下駐扁舟遲暮登臨散旅憂一自秋帆挂明月
風波何處不淹留

登滕王閣

靈風數百里吹送子安舟一醉滕王閣千年水復流江
山清旦迥吳楚碧雲頭忽憶曾乘月淮南太白樓

撫州道上見月有作

歲暮交霜雪關山尙獨征
高風慈母望落葉遠人情
野嘯寒喧鵲雲遲晚度城
鄉思令已劇又對玉蟾清